

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-2337/23
Sarajevo, 5.10.2023. godine

Z A P I S N I K
4. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 5.10.2023. godine

Sjednica je počela sa radom u 12 sati i 18 minuta.

Sjednici je predsjedavao Tomislav Martinović, predsjedavajući Doma naroda Parlamenta Federacije BiH.

Predsjedavajući je pozdravio delegate i potpredsjednika Federacije BiH, premijera Vlade Federacije BiH gospodina Nermina Nikšića sa ministrima, predstavnike Oružanih snaga Bosne i Hercegovine, predstavnike međunarodnih institucija i predstavnike akreditiranih medijskih kuća.

Izostanak sa sjednice najavili su delegati Goran Bulajić, Miomirka Melank i Daliborka Milović.

Prema evidenciji Stručne službe, sjednici prisustvuje 64 delegata, što čini većinu pa Dom naroda može raditi i punovažno odlučivati.

Sa 59 glasova za, bez glasova protiv i bez uzdržanih glasova, predsjedavajući je konstatovao da su delegati usvojili Zapisnik 3. sjednice Doma naroda Parlamenta Federacije BiH.

Prije utvrđivanja dnevnog reda, predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja i pokretati Inicijative.

Belma Kapo je, zajedno sa delegatkinjom Jelenom Pekić, podnijela inicijativu za održavanje tematske sjednice Odbora za boračko-invalidska pitanja, rad, zdravstvenu i socijalnu zaštitu Doma naroda i Odbora za zdravstvo Predstavničkog doma Parlamenta Federacije BiH radi pripremanja novog zakona o načinu finansiranja Fonda solidarnosti i o načinu pružanja zdravstvenih usluga. Također, zatražila je da tematskoj sjednici prisustvuju predstavnici: Zavoda zdravstvenog osiguranja i reosiguranja Federacije BiH, Federalnog ministarstva zdravstva, Federalnog ministarstva finansija, Sekretarijata Vlade Federacije BiH, Vijeća ministara, Agencije za lijekove i medicinska sredstva, Udruženja onkologa u BiH, CCI-a, predstavnici svih kantonalnih ministarstava zdravstva i zavoda zdravstvenog osiguranja i nevladinih organizacija.

Fatima Gavrankapetanović-Smailbegović podnijela je inicijativu kojom zadužuje Vladu Federacije BiH da najkasnije u roku 30 dana od dana dostavljanja, pripremi i u parlamentarnu proceduru uputi Prijedlog Zakona o izmjenama i dopunama Zakona o zdravstvenom osiguranju, sa ciljem osiguranja principa i prava zdravlja za sve i usklađivanje Zakona sa obaveznim zdravstvenim osiguranjem i Zakona o zdravstvenoj zaštiti.

Amir Orlović je postavio dva delegatska pitanja.

Prvo pitanje je upućeno nadležnom resornom ministarstvu, Ministarstvu za pitanja boraca i invalida odbrambeno-oslobodilačkog rata i vezano je uz inicijativu koja je podnesena u prethodnom mandatu u Predstavničkom domu, a tiče se inicijative za izmjenu i dopunu Zakona o posebnim pravima dobitnika ratnih priznanja i odlikovanja i članova njihovih porodica pokrenute od Senada Mašetića tadašnjeg zastupnika u Predstavničkom domu Parlamenta Federacije BiH u sazivu 2018. – 2022. godina.

Drugim pitanjem je tražio od resornog federalnog ministarstva da u saradnji sa kantonalnim ministarstvima, upravama i općinskim službama nadležnim za oblast boračko-invalidske zaštite dostave podatak koji je ukupan broj RVI obje komponente u evidenciji za pitanje boraca invalida odbrambeno-oslobodilačkog rata sa utvrđenim procentom vojne invalidnosti od 60% i više, a koji su status RVI stekli isključivo na osnovu ranjavanja pri obavljanju borbenih zadataka i koji su od ljekarske komisije prilikom prve i svih narednih procjena vojne invalidnosti ocijenjeni kao ograničeno sposobni za vojnu službu.

Iva Raguž je uputila inicijativu ka Komisiji za ravnopravnost spolova Doma naroda Parlamenta Federacije BiH, a u vezi sa hitnim sazivanjem sjednice zbog govora mržnje, prijetnji i pozivanja na linč žena u Domu naroda Parlamenta Federacije BiH.

Emir Dautović je postavio dva delegatska pitanja.

Prvo pitanje je uputio Ministarstvu obrazovanja, nauke i kulture - da li će se izvršiti refundacija roditeljima koji su kupili udžbenike za ovu školsku godinu.

Drugo pitanje je uputio premijeru i resornom ministarstvu, a u vezi sa organiziranjem radnog sastanka kako bi se poduzela inicijativa za izradu Zakona o sportu Federacije BiH.

Almir Babajić je podnio dvije inicijative.

Prva inicijativa je upućena prema Federalnom ministarstvu zdravstva, a odnosi se na: izmjenu i dopunu člana 66. stav 6. Zakona o zdravstvenoj zaštiti Federacije BiH gdje bi se ispred riječi: „medicinski“ dodala riječ: „ekonomski“ a čime bi se diplomiranim ekonomistima omogućilo da konkurišu za pozicije direktora zdravstvenih ustanova u Federaciji BiH; potom na stavljanje van snage odredbe člana 183. Zakona o zdravstvenoj zaštiti Federacije BiH na period od pet godina kojom bi se onemogućilo da zdravstveni radnici zaposleni u javnim zdravstvenim ustanovama u isto vrijeme rade i u privatnim zdravstvenim klinikama; izmjenu zakonskih i podzakonskih akata, te standarde normativa u zdravstvenoj zaštiti kojom bi se u sklopu primarne zdravstvene zaštite u Domu zdravlja, u službama za zdravstvenu zaštitu djece, omogućilo liječenje djece školskog uzrasta; da se podzakonskim aktima i standardima zdravstvene zaštite svaka zdravstvena ustanova u Federaciji BiH obaveže da zaposli bar jednu zaposlenu osobu sa certifikatom za poznavanje znakovnog jezika u cilju olakšanja komunikacije sa gluhonijemim osobama.

Druga inicijativa je upućena Ministarstvu trgovine - da se u proceduru prema Parlamentu Federacije BiH uputi Nacrt Zakona o unutrašnjoj trgovini sa izmjenom

člana 86. stav f), na način da umjesto riječi: „ili korisnik penzije“ piše: „trgovac pojedinac“.

Ivan Ivić je postavio delegatsko pitanje i podnio inicijativu.

Pitanje je upućeno Ministarstvu poljoprivrede, vodoprivrede i šumarstva Federacije BiH u vezi sa davanjem odobrenja Lovačkom društvu Kupres za odstrijel medvjeda koji su se pojavili na ulicama Kupresa jer je to u njihovoj nadležnosti. Inicijativom je tražio da se ovlasti kanton za rješavanje ove problematike - odstrijel medvjeda.

Ivica Pavković je podnio jednu inicijativu - traži od Vlade Federacije BiH da se izmjeni Pravilnik kojim je definirano pravo na ostvarivanje dječijeg doplatka i da se omogući da roditelji, odnosno staratelji djece koja ostvaruju navedeno pravo mogu primati odobrena sredstva na svoj tekući račun jer oni i raspolažu tim sredstvima.

Boris Mrnjavac je uputio inicijativu federalnom ministru zdravstva Nediljku Rimcu u vezi sa izmjenom Zakona o stomatološkoj djelatnosti u smislu izmjene čl. 35. i 37. ovog zakona, koji govore o stomatološkim djelatnicima kao osobama koje imaju obrazovanje i stomatološko usmjerenje i neposredno pružaju stomatološke usluge, te kojim se utvrđuju opći uvjeti za obavljanje stomatološke djelatnosti.

Sanela Klarić je postavila tri delegatska pitanja i uputila tri inicijative.

Prvo pitanje je upućeno Federalnom ministarstvu prostornog uređenja i Federalnoj upravi za inspekcijske poslove - da li je izdato rješenje o uspostavi prijašnjeg stanja zemljišta, odnosno da li je započet proces uspostavljanja prijašnjeg stanja zemljišta na kojem je realizovan projekt izgradnje obale na utvrde na rijekama Drini i Sanici.

Drugo pitanje je upućeno Vladi Federacije BiH i Federalnom ministarstvu poljoprivrede, vodoprivrede i šumarstva, a u vezi sa Strategijom poljoprivrede ruralnog razvoja da se ona što prije uputi u proceduru i da se usvoji kako ne bi došlo do situacije da se zbog planiranja programa poticaja o poljoprivredi mora produžavati ranija strategija kako ne bi došlo do kršenja zakona.

Treće pitanje je upućeno Federalnom ministarstvu obrazovanja i nauke kao i svim kantonalnim ministarstvima za odgoj i obrazovanje - da li su u saradnji sa nadležnim kantonalnim zavodima za javno zdravstvo u Federaciji BiH u nastavne programe za osnovne i srednje škole uključili temu štetnosti pušenja na zdravlje, kako je propisano članom 26. Zakona o kontroli o ograničenoj upotrebi duhana, duhanskih i ostalih proizvoda u Federacije BiH.

Prvom inicijativom je tražila od Federalne uprave za inspekcijske poslove da provjeri zašto je došlo do velikog ekološkog zagađenja na Neretvi.

Druga inicijativa je upućena Federalnom ministarstvu zdravstva, a u vezi sa ubrzanjem procesa donošenja pravilnika o uvjetima za posebne prostorije za konzumiranje cigareta, u smislu izuzetka od zabrane konzumiranja cigareta.

Treću inicijativu je uputila Federalnoj upravi za inspekcijske poslove i Vladi Federacije BiH za prilagođavanje godišnjeg plana za 2024. godinu radi preraspodjele kapaciteta u inspekcijskim sektorima zbog potencijalnog povećanja posla kao i organiziranja

edukacije inspektora u saradnji sa kantonalnim upravama za inspekcijske poslove da tačno znaju šta traže i koji su uvjeti definirani u zakonu.

Sandra Imširović je postavila dva delegatska pitanja i uputila inicijativu.

Prvo pitanje je uputila Uredu za žalbe - traži da se u pisanoj formi dostavi odgovor šta se dešava sa obilaznicom Živinice Lot 2 jer od marta nema informacija za spomenuti pravac.

Drugo pitanje je uputila JP Autoceste Federacije BiH - zašto se stalo sa rekonstrukcijom magistralnog puta M4 Tuzla – Doboj i da li JP Ceste Federacije BiH imaju u planu u toku ove ili naredne godine izdvajati sredstva a potom i završiti započeti dio dionice kada je u pitanju taj dio Tuzlanskog kantona.

Inicijativu je uputila Ministarstvu komunikacija i prometa BiH da u saradnji sa Direkcijom za civilno zrakoplovstvo BiH bez nepotrebnog odgađanja pronađe rješenja za početak zračnih operacija zainteresovane aviokompanije koja se obratila za odobrenje letova sa Međunarodnog aerodroma Tuzla prema Njemačkoj, Švedskoj, Danskoj, Luksemburgu i Austriji kako bi pomogli bh. građanima u toku zimskog perioda letenja.

Damir Džeba je postavio delegatsko pitanje i podnio inicijativu.

Pitanje je uputio službi Doma naroda u vezi zahtjeva Sanela Kajana, zastupnika u Predstavničkom domu Parlamenta Federacije BiH, da prisustvuje sjednici Doma naroda i da li je prisutan.

Inicijativom je zatražio hitno sazivanje sjednice Etičke komisije i odlučivanje vezano za slučaj koji je napravio zastupnik Sanel Kajan, odnosno da gosp. Ivica Šarić, predsjednik Etičke komisije Predstavničkog doma Parlamenta Federacije BiH, sazove sjednicu radi učinjenja povreda nekih od odredaba Kodeksa ponašanja.

Aida Obuća je uputila inicijativu i postavila delegatsko pitanje.

Inicijativu je uputila Vladi Federacije BiH i Federalnom ministarstvu finansija kojom od Doma naroda Parlamenta Federacije BiH traži da zaduži Vladu Federacije BiH da u parlamentarnu proceduru što hitnije uputi Rebalans Budžeta Federacije BiH za 2023. godinu da bi se planirala finansijska sredstva za potrebe finansiranja Fonda solidarnosti Federacije BiH u skladu sa finansijskim planom Zavoda zdravstvenog osiguranja i reosiguranja Federacije BiH za 2023. godinu kako bi se osigurala sredstva za liječenje najugroženijih onkoloških pacijenata i tako ukinule postojeće liste čekanja za najteže oboljele pacijente u Federaciji BiH. Također, inicira da Dom naroda Parlamenta Federacije BiH zaduži Vladu Federacije BiH da prilikom izrade Budžeta Federacije BiH za 2025. godinu uskladi svoju obavezu za finansiranje rada Fonda solidarnosti Federacije BiH sa odredbama Zakona o zdravstvenom osiguranju Federacije BiH.

Pitanje je uputila Federalnom ministarstvu prometa i komunikacija i JP Autoceste Federacije BiH - da li je tačno da se određenim aktivnostima smanjuju finansijska sredstva predviđena za brzu cestu Sarajevo – Goražde i prebacuju za finansiranje brze ceste Mostar – Široki Brijeg i da li se ovakvim aktivnostima dovodi u pitanje realizacija

kapitalnog Projekta izgradnje tunela Hranjen – te sa tim u vezi traži dostavljanje dokumentacije.

Ivo Šimunović je postavio delegatsko pitanje Kemal Hrnjiću, ministru poljoprivrede, vodoprivrede i šumarstva, u vezi sa zaštitom poljoprivrednika u djelatnosti stočarstva, pčelarstva i voćarstva od napada medvjeda.

Ivana Šaravanja-Zrimšek je postavila delegatsko pitanje i uputila inicijativu. Pitanje upućuje ministru pravde Federacije BiH Vedranu Škobiću, a tiče se prakse izbjegavanja suđenja iz zdravstvenih razloga u predmetima ratnih zločina i prvenstveno izbjegavanje služenja zatvorske kazne osuđenih ratnih zločinaca napuštanjem BiH.

Inicijativu je uputila Federalnom ministarstvu kulture i sporta Federacije BiH:

a) na prijedlog lokalnih zajednica a u saradnji sa kantonalnim nadležnim ministarstvima Federalno ministarstvo kulture i sporta utvrđuje i definira institucije od posebnog značaja za Federaciju BiH koje će imati stalno sufinansiranje od Federacije BiH, kao i od kantonalnog lokalnog nivoa;

b) na prijedlog lokalnih zajednica i nevladinih organizacija u saradnji sa kantonalnim nadležnim ministarstvima i Federalnim ministarstvom kulture i sporta utvrđuju se i definiraju programi od posebnog značaja za Federaciju BiH, koji će imati stalno sufinansiranje od Federacije BiH, kao i od kantonalnog lokalnog nivoa.

Enes Peštek je uputio inicijativu Federalnom ministarstvu kulture i sporta kojom predlaže Domu naroda da usvoji zaključak o izmjeni i dopuni Uredbe Vlade Federacije BiH donesene na 301. sjednici, održanoj 3.2.2022. godine, u vezi sa određivanjem kriterija pri dodjeljivanju nagrada zaslužnim sportistima, sportskim radnicima i sportskim udruženjima iz Federacije BiH za ostvarene vrhunske sportske rezultate na međunarodnim takmičenjima.

Muamer Zukić je postavio dva delegatska pitanja.

Prvo pitanje je uputio Vladi Federacije BiH - traži informaciju o nacionalnoj strukturi razriješenih i imenovanih članova upravnih i nadzornih odbora javnih preduzeća i ustanova sa posljednje sjednice Vlade Federacije BiH.

Drugo pitanje je uputio federalnom ministru unutrašnjih poslova gosp. Rami Isaku kojim je zatražio da se ispita i rasvijetli slučaj nabavke oružja za teroristički čin koji je srbijanska teroristička grupa počinila na Kosovu a u koji je Više tužilaštvo u Beogradu svrstalo Tuzlu.

Azhar Sejarić je uputio inicijativu premijeru Vlade Federacije BiH Nerminu Nikšiću da kao ovlaštenu predlagač, a na osnovu odredbi Ustava Federacije BiH, pred Ustavnim sudom Federacije BiH pokrene postupak ocjene ustavnosti Zakona o šumama u Zeničko-dobojskom, Unsko-sanskom, Bosansko-podrinjskom, Srednjobosanskom, Zapadnohercegovačkom, Posavskom i Hercegovačko-neretvanskom kantonu.

Damir Marjanović je uputio inicijativu ministrici obrazovanja i nauke Jasni Duraković da se u planiranju budžeta Federacije BiH za 2024. godinu pokrene proces izrade zakona o naučno-istraživačkoj djelatnosti i da se u vezi sa tim promijeni način podjele tog novca.

Vesna Saradžić je uputila inicijativu Vladi Federacije BiH i resornim ministarstvima da se aktivno uključe u zaštitu entiteta Federacija BiH od posljedica izgradnje Hidroelektrane Ulog u entitetu Republika Srpska snage 35 megavata i sedam manjih hidroelektrana koje čine hidroenergetski sistem Gornja Neretva kako bi se riješio problem.

Haris Zahiragić je uputio tri pitanja premijeru Nerminu Nikšiću.

Prvo pitanje - kolika su domaća i međunarodna zaduženja preuzeta od Vlade Federacije BiH a da su pokrenuta ili realizirana.

Drugo pitanje se odnosi na Termo blok 7, da li se planira i kada će biti realiziran projekt za energetski sektor i energetsku nezavisnost Federacije BiH, a i države generalno.

Treće pitanje je uputio premijeru i resornom ministru zdravstva, a u vezi sa smjenom Upravnog i Nadzornog odbora na Kliničkom centru Univerziteta u Sarajevu, a protivno Statutu, zakonskim i podzakonskim aktima pa pita - na osnovu kojeg zakona i podzaskog akta je Vlada Federacije ovaj postupak uradila, te da li je ministar zdravstva bio sa time upoznat.

Potom se prešlo na utvrđivanje dnevnog reda.

Predsjedavajući je iznio dostavljeni akt Vlade Federacije BiH - Prijedlog Zakona o ujednačavanju penzija ostvarenih prema Zakonu o službi u Oružanim snagama Bosne i Hercegovine po hitnom postupku koji je Dom naroda usvojio sa 55 glasova za, uz pet uzdržanih glasova i bez glasova protiv.

Također, predsjedavajući je iznio dopis Vlade Federacije BiH kojim je povukla iz procedure Nacrt Zakona o izmjenama i dopunama Zakona o pravima demobiliziranih branilaca i članova njihovih porodica, sa prijedlogom da se razmatra po hitnom postupku tj. kao prijedlog Zakona što je Dom naroda, sa 56 glasova za, uz jedan uzdržani glas i bez glasova protiv, prihvatio.

Na osnovu rezultata glasanja, predsjedavajući je konstatovao da je Dom naroda, sa 54 glasa za, uz četiri uzdržana glasa i uz jedan glas protiv, prihvatio Prijedlog Zakona o izmjenama Zakona o visini stope zatezne kamate na javne prihode po hitnom postupku.

Na osnovu rezultata glasanja, predsjedavajući je konstatovao da je Dom naroda, sa 52 glasa za, uz pet uzdržanih glasova i bez glasova protiv, prihvatio Prijedlog Zakona o izmjeni Zakona o utvrđivanju i ostvarivanju potraživanja građana u postupku privatizacije po skraćenom postupku.

Na osnovu rezultata glasanja, predsjedavajući je konstatovao da je Dom naroda, sa 51 glasom za, uz osam uzdržanih glasova i uz jedan glas protiv, prihvatio Prijedlog Zakona o izmjeni Zakona o konstituisanju novih općina u Federaciji BiH i izmjeni područja općina podijeljenih međuentiteskom i međukantonalnom crtom po skraćenom postupku.

Na osnovu rezultata glasanja, predsjedavajući je konstatovao da je Dom naroda, sa 54 glasa za, uz četiri uzdržana glasa i bez glasova protiv, prihvatio da se Prijedlog Zakona o izmjenama Zakona o obaveznim osiguranjima u saobraćaju u predmetu razmatra u formi nacрта.

Predsjedavajući je iznio prijedlog Kolegija Doma naroda da se u dnevni red uvrsti tačka - Prijedlog Odluke o prihvatanju zaduženja po Ugovoru o zajmu između BiH i Međunarodne banke za obnovu i razvoj za Projekt modernizacija vodnih i sanitarnih usluga - budući da je on usvojen u Predstavničkom domu.

Sa 56 glasova za, uz tri uzdržana glasa i uz tri glasa protiv, predsjedavajući je konstatovao da je Dom naroda prihvatio Prijedlog Odluke o prihvatanju zaduženja po Ugovoru o zajmu između BiH i Međunarodne banke za obnovu i razvoj za Projekt modernizacija vodnih i sanitarnih usluga.

Predsjedavajući je konstatovao da je, sa 49 glasova za, uz 7 uzdržanih glasova i bez glasova protiv, prijedlog Kolegija da se sa dnevnog reda sjednice skine tačka - Izbor i imenovanje - dobio potrebnu većinu.

Delegatkinja **Aida Obuća**, predsjednica Komisije za ravnopravnost spolova, tražila je da se u dnevni red uvrsti Zaključak Komisije koji je jednoglasno podržala i obrazložila, a vezano je uz donošenje Nacrta Zakona o zaštiti od nasilja u porodici, kao i izmjena i dopuna Krivičnog zakona Federacije BiH.

Na osnovu rezultata glasanja, predsjedavajući je konstatovao da je ovaj zaključak, sa 52 glasa za, uz četiri uzdržana glasa i bez glasova protiv, dobio potrebnu većinu da se uvrsti u dnevni red.

Na osnovu rezultata glasanja, predsjedavajući je konstatovao da je Dom naroda, sa 53 glasa za, uz pet uzdržanih glasova i bez glasova protiv, usvojio sljedeći:

DNEVNI RED

1. Prijedlog Zakona o ujednačavanju penzija ostvarenih prema Zakonu o službi u Oružanim snagama Bosne i Hercegovine – hitni postupak,
2. Prijedlog Zakona o izmjenama i dopunama Zakona o pravima demobiliziranih branilaca i članova njihovih porodica – hitni postupak,
3. Prijedlog Zakona o izmjenama Zakona o visini stope zatezne kamate na javne prihode – hitni postupak,
4. Prijedlog Zakona o izmjeni Zakona o utvrđivanju i ostvarivanju potraživanja građana u postupku privatizacije - skraćeni postupak,
5. Prijedlog Zakona o izmjeni Zakona o konstituiranju novih općina u Federaciji BiH i izmjeni područja općina podijeljenih međuentiteskom i međukantonalom crtom - skraćeni postupak,
6. Nacrt Zakona o izmjenama i dopuni Zakona o obaveznim osiguranjima u saobraćaju - skraćeni postupak,
7. Nacrt Zakona o jakim alkoholnim pićima,
8. Nacrt Zakona o izmjenama i dopunama Zakona o prostornom planiranju i korištenju zemljišta na nivou Federacije BiH,
9. Nacrt Zakona o izmjenama i dopuni Porodičnog zakona Federacije BiH,
10. Nacrt Zakona o izmjenama i dopunama Zakona o vanparničnom postupku,
11. Prijedlog Strategije razvoja turizma Federacije BiH 2022. - 2027. godina,

12. Informacija o aktivnostima u postupku izdavanja energetske dozvole za izgradnju fotonaponske elektrane EPHZHB 1 od privrednog društva Javno preduzeće "Elektroprivreda HZ Herceg-Bosna" dioničko društvo Mostar sa Prijedlogom zaključka,
13. Prijedlog Odluke o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt unapređenja kvaliteta zraka,
14. Prijedlog Odluke o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt finansiranja razvojne politike zdravstvenog sektora,
15. Prijedlog Odluke o prihvatanju zaduženja po Ugovoru o zajmu između Bosne i Hercegovine i Međunarodne banke za obnovu i razvoj za Projekt modernizacija vodnih i sanitarnih usluga,
16. Zaključak Komisije za ravnopravnost spolova.

1. Prijedlog Zakona o ujednačavanju penzija ostvarenih prema Zakonu o službi u Oružanim snagama Bosne i Hercegovine – hitni postupak

Tekst Prijedloga Zakona utvrdila je Vlada Federacije BiH.

Predstavnički dom obavijestio je Dom naroda da je na 5. sjednici, održanoj 27.9.2023. godine, usvojio Prijedlog Zakona o ujednačavanju penzija ostvarenih prema Zakonu o službi u Oružanim snagama Bosne i Hercegovine u tekstu kako ga je predložila Vlada Federacije BiH.

Prijedlog zakona su razmatrala nadležna radna tijela.

Predsjedavajući je pozvao predstavnika Vlade Federacije BiH ministra Nedžada Lokmića da obrazloži Prijedlog Zakona o ujednačavanju penzija ostvarenih prema Zakonu o službi u Oružanim snagama Bosne i Hercegovine.

U raspravi je učestvovao delegat Ivo Tadić.

Na osnovu rezultata glasanja, predsjedavajući je konstatovao da je Dom naroda, sa 62 glasa za, uz dva uzdržana glasa i bez glasova protiv, usvojio Prijedlog Zakona o ujednačavanju penzija ostvarenih prema Zakonu o službi u Oružanim snagama Bosne i Hercegovine.

2. Prijedlog Zakona o izmjenama i dopunama Zakona o pravima demobiliziranih branilaca i članova njihovih porodica – hitni postupak

Tekst Prijedloga Zakona utvrdila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, usvojio Prijedlog Zakona o izmjenama i dopunama Zakona o pravima demobiliziranih branilaca i članova njihovih porodica u tekstu kako ga je predložila Vlada Federacije BiH.

Prijedlog zakona su razmatrala nadležna radna tijela.

Predsjedavajući je pozvao predstavnika Vlade Federacije BiH ministra Nedžada Lokmića da obrazloži Prijedlog Zakona.

U raspravi su učestvovali: Ilija Nakić, Amir Orlović, Emir Dautović, Oliver Soldo i Irfan Čengić.

Na osnovu rezultata glasanja, predsjedavajući je konstatovao da je Dom naroda, sa 58 glasova za, uz tri uzdržana glasa i bez glasova protiv, usvojio Prijedlog Zakona o izmjenama i dopunama Zakona o pravima demobiliziranih branilaca i članova njihovih porodica.

3. Prijedlog Zakona o izmjenama Zakona o visini stope zatezne kamate na javne prihode

Tekst Prijedloga Zakona utvrdila je Vlada Federacije BiH.

Naknadno je Vlada Federacije BiH dostavila amandman na Prijedlog Zakona o izmjenama Zakona o visini stope zatezne kamate na javne prihode, koji je postao sastavni dio Prijedloga Zakona.

Predstavnički dom je obavijestio Dom naroda da je na 5. sjednici, održanoj 27.9.2023. godine, usvojio Prijedlog Zakona o izmjenama Zakona o visini stope zatezne kamate na javne prihode sa jednim amandmanom Vlade Federacije BiH, koji je postao sastavni dio teksta Prijedloga Zakona.

Prijedlog Zakona su razmatrala nadležna radna tijela.

Predsjedavajući je pozvao predstavnika Vlade Medinu Dudo, pomoćnicu ministra finansija, da obrazloži Prijedlog Zakona o izmjenama Zakona o visini stope zatezne kamate na javne prihode.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 46 glasova za, uz sedam uzdržanih glasova i bez glasova protiv, usvojio Prijedlog Zakona o izmjenama Zakona o visini stope zatezne kamate na javne prihode.

4. Prijedlog Zakona o izmjeni Zakona o utvrđivanju i ostvarivanju potraživanja građana u postupku privatizacije - skraćeni postupak

Tekst Prijedloga Zakona utvrdila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, usvojio Prijedlog Zakona o izmjeni Zakona o utvrđivanju i ostvarivanju

potraživanja građana u postupku privatizacije sa jednim amandmanom, koji je Vlada Federacije BiH prihvatila pa je postao dio Prijedloga Zakona.

Prijedlog Zakona razmatrala su nadležna radna tijela.

Predsjedavajući je pozvao predstavnika Federalnog ministarstva finansija Jasmina Rustemija da obrazloži Prijedlog Zakona o izmjeni Zakona o utvrđivanju i ostvarivanju potraživanja građana u postupku privatizacije.

U raspravi niko nije učestvovao.

Sa 45 glasova za, uz devet uzdržanih glasova i bez glasova protiv, Dom naroda je usvojio Prijedlog Zakona o izmjeni Zakona o utvrđivanju i ostvarivanju potraživanja građana u postupku privatizacije.

5. Prijedlog Zakona o izmjeni Zakona o konstituiranju novih općina u Federaciji BiH i izmjeni područja općina podijeljenih međuentiteskom i međukantonalnom crtom - skraćeni postupak

Tekst Prijedloga Zakona utvrdila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, usvojio Prijedlog Zakona o izmjeni Zakona o konstituiranju novih općina u Federaciji BiH i izmjeni područja općina podijeljenih međuentiteskom i međukantonalnom crtom u tekstu kako ga je predložila Vlada Federacije BiH.

Prijedlog Zakona razmatrala su nadležna radna tijela.

Predsjedavajući je pozvao predstavnicu Vlade Ivanu Lesko iz kabineta federalnog ministra pravde da obrazloži Prijedlog Zakona o izmjeni Zakona o konstituiranju novih općina u Federaciji BiH i izmjeni područja općina podijeljenih međuentiteskom i međukantonalnom crtom.

Predsjedavajući je pozvao Harisa Zahiragića da u ime radnog tijela obrazloži izvještaj.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 41 glasom za, uz 10 uzdržanih glasova i uz 10 glasova protiv, usvojio Prijedlog Zakona o izmjeni Zakona o konstituiranju novih općina u Federaciji BiH i izmjeni područja općina podijeljenih međuentiteskom i međukantonalnom crtom.

6. Nacrt Zakona o izmjenama i dopuni Zakona o obaveznim osiguranjima u saobraćaju - skraćeni postupak

Tekst Nacrta Zakona utvrdila je Vlada Federacije BiH.

Predstavnički dom obavijestio je Dom naroda da je na 5. sjednici, održanoj 27.9.2023. godine, razmatrao tekst Nacrta Zakona.

Nacrt Zakona razmatrala su nadležna radna tijela.

Predsjedavajući je pozvao predstavnika Federalnog ministarstva finansija Jasmina Rustemija da obrazloži Nacrt Zakona o izmjenama i dopuni Zakona o obaveznim osiguranjima u saobraćaju.

U raspravi su učestvovali: Haris Zahiragić, Jasmin Zukić, Irfan Čengić i Ivo Šimunović.

Na osnovu rezultata glasanja, predsjedavajući je konstatovao da je Dom naroda, sa 43 glasa za, uz sedam uzdržanih glasova i uz 12 glasova protiv, prihvatio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o izmjenama i dopuni Zakona o obaveznim osiguranjima u saobraćaju i smatra da može poslužiti kao osnova za izradu prijedloga Zakona.
2. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na sjednici Doma naroda, kao i one koje su dostavljene ili će biti dostavljene u pisanoj formi.

7. Nacrt Zakona o jakim alkoholnim pićima

Tekst Nacrta Zakona utvrdila je Vlada Federacije BiH.

Predstavnički dom obavijestio je Dom naroda da je na 5. sjednici, održanoj 27.9.2023. godine, razmatrao tekst Nacrta Zakona.

Nacrt Zakona razmatrala su nadležna radna tijela.

Predsjedavajući je pozvao predstavnika Vlade Federacije BiH pomoćnika Federalnog ministra za poljoprivredu i prehrambenu industriju Bešču Alibegovića da obrazloži Nacrt Zakona o jakim alkoholnim pićima.

U raspravi su učestvovali Damir Džeba, Damir Marjanović i Beščo Alibegović.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz 10 uzdržanih glasova i uz tri glasa protiv, prihvatio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o jakim alkoholnim pićima, te smatra da može poslužiti kao osnov za izradu prijedloga Zakona.
2. Zadužuje se Vlada Federacije da organizira i provede javnu raspravu od 90 dana u skladu sa procedurama predviđenim u Ustavu Federacije BiH za donošenje Zakona i zajedničke nadležnosti federalne vlasti i kantona.
3. Zadužuje se Stručna služba Doma naroda Parlamenta Federacije BiH da ovaj zaključak i Nacrt Zakona o jakim alkoholnim pićima dostavi kantonalnim skupštinama radi davanja mišljenja u roku 30 dana.
4. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene na sjednici Doma naroda, iznesene u javnoj raspravi, kao i mišljenja kantonalnih skupština.

8. Nacrt Zakona o izmjenama i dopunama Zakona o prostornom planiranju i korištenju zemljišta na nivou Federacije BiH

Nacrt Zakona utvrdila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, razmatrao Nacrt Zakona o izmjenama i dopunama Zakona o prostornom planiranju i korištenju zemljišta na nivou Federacije BiH i Zaključkom ga prihvatio.

Nacrt Zakona razmatrala su nadležna radna tijela.

Predsjedavajući je pozvao predstavnika Vlade Federacije BiH ministra prostornog uređenja Željka Nedića da obrazloži Nacrt Zakona o izmjenama i dopunama Zakona o prostornom planiranju i korištenju zemljišta na nivou Federacije BiH.

Predsjedavajući je pozvao Harisa Zahiragića i Kristinu Petrović, predstavnike radnih tijela da obrazlože izvještaje.

U raspravi su učestvovali: Damir Džeba, Haris Zahiragić, Sanela Klarić, Željko Nedić, Tomislav Martinović i Damir Marjanović.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz 5 suzdržanih glasova i uz 8 glasova protiv, prihvatio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o izmjenama i dopunama Zakona o prostornom planiranju i korištenju zemljišta na nivou Federacije BiH i smatra da može poslužiti kao osnov za izradu prijedloga Zakona.

2. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na sjednici Doma naroda, kao i one koje su dostavljene ili će biti dostavljene u pisanoj formi.

Delegatkinja Kristina Petrović, u ime Komisije za prostorno uređenje, ekologiju i stambeno komunalne poslove, predložila je Zaključak.

Na osnovu rezultata glasanja predsjedavajući konstatovao da Dom naroda, sa 38 glasova za, uz 6 suzdržanih glasova i uz 17 glasova protiv, nije prihvatio ovaj Zaključak.

Delegatkinja Sanela Klarić je zatražila pojedinačno izjašnjavanje u vezi sa Zaključkom.

Na osnovu pojedinačnog izjašnjavanja, predsjedavajući je konstatovao da je Dom naroda, sa 60 glasova za, uz 1 suzdržani glas i bez glasova protiv, prihvatio sljedeći:

ZAKLJUČAK

Obavezuju se Vlada Federacije BiH i Federalno ministarstvo pravde da u što skorijem periodu izrade sveobuhvatan zakon o inženjerskoj komori Federacije BiH.

9. Nacrt Zakona o izmjenama i dopuni Porodičnog zakona Federacije BiH

Tekst Nacrta Zakona utvrdila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, razmatrao Nacrt Zakona o izmjenama i dopuni Porodičnog zakona Federacije BiH i Zaključkom ga prihvatio.

Nacrt Zakona razmatrala su nadležna radna tijela.

Predsjedavajući je pozvao Ivanu Lesko, predstavnicu Vlade Federacije BiH, da obrazloži Nacrt Zakona o izmjenama i dopuni Porodičnog zakona Federacije BiH.

U raspravi su učestvovali Sandra Imširović i Aida Obuća.

Na osnovu rezultata glasanja, predsjedavajući je konstatovao da je Dom naroda, sa 46 glasova za, bez uzdržanih glasova i uz četiri glasa protiv, prihvatio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o izmjenama i dopuni Porodičnog zakona Federacije BiH i smatra da može poslužiti kao osnov za izradu prijedloga Zakona.
2. Zadužuje se predlagač da provede javnu raspravu u trajanju 40 dana.
3. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na sjednici Doma naroda,

javnoj raspravi, kao i one koje su dostavljene ili će biti dostavljene u pisanoj formi.

10. Nacrt Zakona o izmjenama i dopunama Zakona o vanparničnom postupku

Nacrt zakona utvrdila je Vlada Federacije BiH.

Predstavnički dom je prihvatio tekst Nacrt Zakona o izmjenama i dopunama Zakona o vanparničnom postupku na 5. sjednici, održanoj 27.9.2023. godine.

Nacrt Zakona razmatrala su nadležna radna tijela.

Predsjedavajući je pozvao Ivanu Lesko, predstavnicu Vlade Federacije BiH, da obrazloži Nacrt Zakona o izmjenama i dopunama Zakona o vanparničnom postupku.

U raspravi je učestvovao Haris Zahiragić.

Na osnovu rezultata glasanja, predsjedavajući je konstatovao da je Dom naroda, sa 53 glasa za, uz jedan uzdržani glas i uz tri glasa protiv, prihvatio sljedeći:

ZAKLJUČAK

1. Dom naroda Parlamenta Federacije BiH prihvata Nacrt Zakona o izmjenama i dopunama Zakona o vanparničnom postupku, te smatra da može poslužiti kao osnov za izradu prijedloga Zakona.
2. Zadužuje se predlagač da organizira i provede javnu raspravu u trajanju 60 dana.
3. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene u raspravi na sjednici Doma naroda, javnoj raspravi, kao i one koje su dostavljene ili će biti dostavljene u pisanoj formi.

11. Prijedlog Strategije razvoja turizma Federacije BiH 2022. - 2027. godina

Vlada Federacije BiH je dostavila Parlamentu Federacije BiH Prijedlog Strategije razvoja turizma Federacije BiH 2022. - 2027. godina radi razmatranja i usvajanja.

Predstavnički dom je Strategiju razvoja turizma Federacije BiH 2022. - 2027. godina usvojio na 5. sjednici, održanoj 27.9.2023. godine.

Prijedlog Strategije su razmatrala nadležna radna tijela.

Predsjedavajući je pozvao predstavnicu Vlade Federacije BiH Faridu Cikotić, pomoćnicu ministricu za turizam i ugostiteljstvo u Federalnom ministarstvu okoliša i

turizma, da obrazloži Prijedlog Strategije razvoja turizma Federacije BiH 2022. - 2027. godina.

Predsjedavajući je pozvao Nezima Alagića, zamjenika predsjednika radnog tijela da obrazloži izvještaj.

U raspravi su učestvovali: Muamer Zukić, Almir Babajić, Emir Dautović, Irfan Čengić, Vedrana Vujović, Vibor Handžić, Ivo Šimunović, Sanela Klarić i Farida Cikotić.

Na osnovu rezultata glasanja, predsjedavajući je konstatovao da je Dom naroda, sa 51 glasom za, uz pet uzdržanih glasova i uz jedan glas protiv, usvojio Strategiju razvoja turizma Federacije BiH 2022. - 2027. godina.

Delegat Almir Babajić je u okviru ove tačke predložio Zaključak. Na osnovu rezultata glasanja, predsjedavajući je konstatovao da je Dom naroda, sa 54 glasa za, uz četiri uzdržana glasa i bez glasova protiv, prihvatio sljedeći:

ZAKLJUČAK

Dom naroda Parlamenta Federacije BiH upućuje Inicijativu prema Ministarstvu vanjskih poslova Bosne i Hercegovine da uputi prijedlog prema Ministarstvu vanjskih i europskih poslova i Ministarstvu mora, prometa i infrastrukture Republike Hrvatske da na graničnom prijelazu Klek formiraju istureni odjel lučke kapetanije Ploče s ciljem lakšeg prometa brodica iz Neuma i u Neum.

12. Informacija o aktivnostima u postupku izdavanja energetske dozvole za izgradnju fotonaponske elektrane EPHZHB 1 od privrednog društva Javno preduzeće "Elektroprivreda HZ Herceg-Bosna" dioničko društvo Mostar sa Prijedlogom zaključka

Informaciju je utvrdila Vlada Federacije BiH i dostavila Parlamentu Federacije BiH.

Vlada Federacije BiH je dostavila Prijedlog Zaključka o davanju prethodne saglasnosti u postupku izdavanja energetske dozvole privrednom društvu.

Predstavnički dom je obavijestio Dom naroda da je na 5. sjednici, održanoj 27.9.2023. godine, razmatrao Informaciju o aktivnostima u postupku izdavanja energetske dozvole za izgradnju fotonaponske elektrane EPHZHB 1 od privrednog društva Javno preduzeće "Elektroprivreda HZ Herceg-Bosna" dioničko društvo Mostar i donio Zaključak o davanju prethodne saglasnosti u postupku izdavanja energetske dozvole spomenutom privrednom društvu.

Informaciju su razmatrala nadležna radna tijela.

Predsjedavajući je pozvao predstavnika Vlade Federacije BiH Halku Balavca, pomoćnik ministra u Federalnom ministarstvu energije, rudarstva i industrije, da obrazloži Informaciju i Prijedlog zaključka.

Predsjedavajući je pozvao Nezima Alagića, zamjenika predsjednika radnog tijela da obrazloži izvještaj.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 50 glasova za, uz šest uzdržanih glasova i uz jedan glas protiv, prihvatio sljedeći:

ZAKLJUČAK

o davanju prethodne saglasnosti u postupku izdavanja energetske dozvole privrednom društvu Javno preduzeće „Elektroprivreda HZ Herceg-Bosna“ dioničko društvo Mostar

1. Daje se prethodna saglasnost Federalnom ministarstvu energije, rudarstva i industrije u postupku izdavanja energetske dozvole privrednom društvu Javno preduzeće „Elektroprivreda HZ Herceg-Bosna“ dioničko društvo Mostar za izgradnju fotonaponske elektrane EPHZHB 1, odobrene snage priključenja 150 MW, planirane godišnje proizvodnje električne energije od 263 GWh, koja se planira graditi na lokaciji Privredno-poslovna zona Hodovo, Općina Stolac.
2. Zadužuje se Federalno ministarstvo energije, rudarstva i industrije da pristupi aktivnostima propisanim članom 23. st. (4), (5), (6) i (7) i članom 24. Uredbe o postupku, kriterijima, formi i sadržaju zahtjeva za izdavanja energetske dozvole za izgradnju novih i rekonstrukciju postojećih proizvodnih postrojenja („Službene novine Federacije BiH“, br. 27/14) na izdavanju energetske dozvole iz tačke 1. ovog zaključka.
3. Ovaj zaključak stupa na snagu narednog dana od dana objavljivanja u „Službenim novinama Federacije BiH“.

13. Prijedlog Odluke o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt unapređenja kvaliteta zraka

Prijedlog Odluke dostavila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, donio odluku o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt unapređenja kvaliteta zraka.

Prijedlog Odluke su razmatrala nadležna radna tijela.

Predsjedavajući je pozvao predstavnika Vlade Federacije BiH Vedada Nezirića, šef Odsjeka za zaduživanje u Federalnom ministarstvu finansija, da obrazloži Prijedlog Odluke o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt unapređenja kvaliteta zraka.

U raspravi su učestvovali: Eldin Delić, Sanela Klarić, Vedad Nezirić, Muamer Zukić, Haris Zahiragić, Tomislav Martinović, Vibor Handžić, Nezim Alagić, Aida Obuća, Vesna Saradžić i Aljoša Čampara.

Na osnovu rezultata glasanja, predsjedavajući je konstatovao da je Dom naroda, sa 42 glasa za, uz dva uzdržana glasa i uz 12 glasova protiv, usvojio Prijedlog Odluke o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt unapređenja kvaliteta zraka.

14. Prijedlog Odluke o prihvatanju zaduženja po sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt finansiranja razvojne politike zdravstvenog sektora

Prijedlog Odluke dostavila je Vlada Federacije BiH.

Predstavnički dom je obavijestio Dom naroda da je na 5. sjednici, održanoj 27.9.2023. godine, prihvatio Prijedlog Odluke o prihvatanju zaduženja po sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt finansiranja razvojne politike zdravstvenog sektora.

Prijedlog Odluke su razmatrala nadležna radna tijela.

Predsjedavajući je pozvao predstavnika Vlade Federacije BiH Vedada Nezirića, šef Odsjeka za zaduživanje u Federalnom ministarstvu finansija, da obrazloži Prijedlog Odluke o prihvatanju zaduženja po sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt finansiranja razvojne politike zdravstvenog sektora.

U raspravi su učestvovali: Emir Dautović, Belma Kapo, Fatima Gavrankapetanović-Smailbegović, Vedad Nezirić, Tomislav Martinović, Vibor Handžić i Aida Obuća.

Na osnovu rezultata glasanja, predsjedavajući je konstatovao da je Dom naroda, sa 42 glasa za, uz četiri uzdržana glasa i uz pet glasova protiv, usvojio Prijedlog Odluke o prihvatanju zaduženja po Sporazumu o zajmu između Bosne i Hercegovine i Međunarodne banke za obnovu i razvoj (IBRD) za Projekt finansiranja razvojne politike zdravstvenog sektora.

15. Prijedlog Odluke o prihvatanju zaduženja po Ugovoru o zajmu između Bosne i Hercegovine i Međunarodne banke za obnovu i razvoj (IBRD) za Projekt modernizacija vodnih i sanitarnih usluga

Prijedlog Odluke dostavila je Vlada Federacije BiH radi razmatranja i donošenja.

Predstavnički dom je na sjednici, održanoj 6.6.2022. godine, prihvatio Prijedlog Odluke o prihvatanju zaduženja po Ugovoru o zajmu između Bosne i Hercegovine i Međunarodne banke za obnovu i razvoj (IBRD) za Projekt modernizacija vodnih i sanitarnih usluga.

Prijedlog Odluke su razmatrala nadležna radna tijela.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda, sa 41 glasom za, uz sedam uzdržanih glasova i uz četiri glasa protiv, usvojio Prijedlog Odluke o prihvatanju zaduženja po Ugovoru o zajmu između Bosne i Hercegovine i Međunarodne banke za obnovu i razvoj (IBRD) za Projekt modernizacija vodnih i sanitarnih usluga.

16. Zaključak Komisije za ravnopravnost spolova

Na osnovu rezultata glasanja, predsjedavajući je konstatovao da je Dom naroda, sa 49 glasova za, bez uzdržanih glasova i bez glasova protiv, prihvatio sljedeći:

Z A K L J U Č A K

1. Komisija za ravnopravnost spolova Doma naroda Parlamenta Federacije BiH podržava započete aktivnosti Federalnog ministarstva pravde o formiranju radne grupe za izradu prijedloga Zakona o zaštiti od nasilja u porodici, te sugeriše Federalnom ministarstvu pravde da izradu prijedloga Zakona o zaštiti od nasilja u porodici i izmjene i dopune Krivičnog zakona u Federaciji BiH razmatra istovremeno kako bi se došlo do adekvatnijeg zakonskog okvira kroz koji će se zaštititi žrtve nasilja i pooštriti kaznena politika za počinitelje nasilja.
2. Obavezuje se Federalno ministarstvo pravde da u roku 90 dana u parlamentarnu proceduru dostavi prijedlog Zakona o zaštiti od nasilja u porodici kao i izmjene i dopune Krivičnog zakona Federacije BiH.

Sjednica se završila rad u 19 sati i 8 minuta.

* * *

Transkript sjednice čini sastavni dio Zapisnika.

SEKRETAR
Izmir Hadžić

PREDSJEDAVAJUĆI
Tomislav Martinović